

Segun Comunidad Cristian di Aruba

Legalisacion di marihuana y matrimonio di mesun sexo lo tin consecuencia hopi grandi pa nos pais

ORANJESTAD- Comunidad di Aruba por a tuma nota cu legalisacion di matrimonio di mesun sexo y di marihuana ta haya atencion den e campaña politico actual. E dos puntonan aki lo tin consecuencia hopi grandi pa nos pais. Den un pais democratico y civilisa un gobierno semper sa scucha opinion di pueblo den asuntonan cu tin consecuencia grandi. Por scucha pueblo via un referendum pero te na e momento aki pueblo no a wordo scucha den e topiconan aki. No ta husto pa uza e puntonan aki den un campaña politico pa gana voto sin cu a scucha pueblo. Apesar cu na varios pais le-


galisacion di matrimonio di e mesun sexo a bira un realidad caba, tin pais manera Venezuela, Rusia y Finlandia cu a rechasa esaki den nan Parlamento.

Colombia ta e pais na unda si nan a tene un referendum y resultado tabata cu mas di 70% di e pueblo Colombiano a rechasa legalisacion di matrimonio di e mesun sexo. Comunidad Cristian di Aruba no ta di acuerdo pa e decadencia social y moral aki drenta den nos comunidad. Tur mucha tin derecho di lanta den un hogar caminda nan ta ricibi formacion di un mama y un tata. Homber y muher ta complementa otro den famia

y cada un tin su contribucion vital pa duna den e formacion di mucha. E politico cu ta bringa pa cambia ley pa asina homber cu homber y muher cu muher por casa cu otro ta haciendo algo contra boluntad di Dios y contra fundeshi di nos comunidad, cual ta famia.

Ta bon pa recorda comunidad cu mayoria adicto di Aruba cu awe ta den centronan di rehabilitacion ta bisa cu nan prome droga tabata marihuana. Kiermen marihuana ta un droga trampolin cu ta hiba na uzo di droganan mas pisa. Ta conoci tambe cu humamento ta causa hopi daño na salud di hende y segun ciencia medico 30% di esnan cu ta huma lo haya cancer di pulmon. Ademá 70% di esnan cu ta huma lo haya un malesa serio relaciona cu humamento y un cigarra di marihuana ta causa mes hopi daño cu cinco cigarra normal.

Aunke na Hulanda benta di marihuana ta legal, ta bon conoci cu den y rond di e coffee shopnan cu ta bende marihuana legalmente tin tambe benta ilegal di tur tipo droga. Kiermen benta di marihuana ta forma un atraccion pa benta di otro droganan tambe. Parlamento di Aruba ta e instancia cu tin ultimo palabra



den aproba of desaproba un proposicion di ley. Proximo eleccion ta pa dicidi ken lo bira e homber y muhernan cu lo representa pueblo di Aruba den Parlamento na momento cu mester dicidi riba proposicionnan di e leyman aki. Cristiannan mester por conta riba homber y muhernan

balente cu lo defende moralidad y principianan di Dios riba di tur otro interes. Pesey ta importante pa comunidad Cristian di Aruba den e proximo eleccion vota pa politico cu lo defende nan principianan Cristian den Parlamento ora ta trata leyman cu ta bay contra Palabra di Dios. □

